

05 APR 1996

Bosnia-Wakil

WAKIL TERTINGGI MASYARAKAT ANTARABANGSA KE BOSNIA LAWAT MALAYSIA

KUALA LUMPUR, 5 April (Bernama) -- Wakil Tertinggi masyarakat antarabangsa ke Bosnia-Herzegovina, Carl Bildt, akan tiba di sini esok untuk lawatan dua hari bertujuan memperbaharui dan mendapatkan sokongan Malaysia dalam pembinaan semula negara Balkan yang hancur akibat peperangan itu.

Bildt yang juga bekas perdana menteri Sweden, dijadualkan menemui Menteri Luar Datuk Abdullah Ahmad Badawi di sebelah petang, menurut kenyataan Wisma Putra hari ini.

Antara lain mereka dijangka berbincang mengenai persidangan kedua kalangan negara penyumbang kepada Bosnia yang akan diadakan di Brussels pada 12 dan 13 April ini.

Bildt juga dijadualkan mengunjungi Perdana Menteri Datuk Seri Dr Mahathir Mohamad.

Bildt, yang ditugaskan mengawasi pelaksanaan perjanjian damai Dayton, pernah melawat Malaysia dalam tahun 1994 sebagai Perdana Menteri Sweden.

Dalam lawatan kali ini beliau akan diiringi oleh penasihat khas, Dame Pauline Neville-Jones, jurucakap Michael Maclay dan setiausaha peribadi Bjorn Lyvvall.

Malaysia telah mengambil pendirian yang tegas mengenai penderitaan rakyat Bosnia dan memainkan peranan penting melahirkan kumpulan membantu di kalangan anggota Pertubuhan Persidangan Islam untuk membantu membina semula negara itu.

Langkah Malaysia yang terakhir untuk membantu rakyat Bosnia ini termasuk usaha dua bulan guru dan murid sekolah di seluruh negara mengumpulkan sejumlah RM3.2 juta (AS\$1.3 juta) untuk membina semula sebuah sekolah di Sarajevo.

Jumlah itu akan disampaikan oleh Perdana Menteri Datuk Seri Dr Mahathir Mohamad kepada kerajaan Bosnia dalam lawatan beliau ke negara-negara Balkan akhir bulan ini.

Menurut laporan Bank Dunia, Bosnia memerlukan lebih kurang AS\$5,100 juta (RM12,750 juta) untuk pembinaan semula dalam masa tiga atau empat tahun.

Persidangan pertama negara-negara membantu itu Disember lepas telah menjanjikan bantuan berjumlah AS\$500 juta (RM1,250 juta) dalam masa separuh tahun 1996.

Bildt akan berlepas ke Tokyo dari sini. -- BERNAMA

TCL WAT NMO